

SURSELVA

Quei e tschei el Museum Cuort Ligia Grischa

El Museum Cuort Ligia Grischa a Trun datti duront il meins da settember differentas occurrenzas.

Dumengia proxima, ils 8 da settember 2024 il suentermiezdi allas 14.15 ha liug a Trun el museum ina guida atras duas exposiziuns. L'empresca guida pertucca «Sogn Gieri 1698. Ils delegai dalla Ligia Grischa s'entaupan a Trun» Quella exposiziun ei dedicata cumpleinamain al giubileum da 600 onns Ligia Grischa. La secunda guida meina tras l'exposiziun «Grisch». Cheu presenta il museum lavurs contemporanas da 16 artistas ed artists digl anteriur territori dalla Ligia Grischa. L'exposiziun ei vegnida realisada en collaboraziun cun Visarte Grischun.

Guid da cultura ed uoppens da famiglia

Sonda, ils 14 da settember 2024 allas 16.15 ha liug el Museum Cuort Ligia Grischa la vernissascha dil cudisch «Guid da cultura Cuort Ligia Grischa Trun» culs auturs *Sandro Decurtins* e *Marc Antoni Nay*. La dumengia dils 22 da settember 2024 allas 14.15 envidan il Museum Cuort Ligia Grischa e l'actura *Sandra Blum*, alias fumitgasa Greta ad in luvratori davart ils uoppens da famiglia. (cdm/fmr)



Il Museum Cuort Ligia Grischa a Trun porscha differentas occurrenzas culturalas il settember 2024.

FOTO HANS HUONDER

VALENDAU

Bombay Street en dus



Sunan proximamein a Valendau, 77 Bombay Street, denton mo en dus.

FOTO SOMEDIA

La band 77 Bombay Street se presenta sonda, ils 14 da settember 2024 ella halla polivalenta da Valendau. E sco quei ch'ina comunicaziun dall'organisaziun turistica da Stussavgia tradescha se presenta Bombay Street sco duo. Il concert dils 14 da settember entscheiva allas 20.00. Las portas dalla halla polivalenta da Valendau ein aviartas naven dallas 19.00 e suenter concert datti menaschi da bar. L'entrada per carschi cuosta 30 francs. (cdm/fmr)

SURSELVA

Mattiu Cathomen da niev tier il marcau da Cuera

Avon paucs dis ha *Mattiu Cathomen*, oriunds da Falera, supriu igl uffeci da menader dalla partiziun uaul ed alps tier il marcau da Cuera. Entras sia funcziun semeglionta tier la vischnaunca da Tumein ha el las enonuschientschas professunalas per quella funcziun. Sco menader dalla partiziun uaul ed alps tier il marcau da Cuera ei Mattiu Cathomen responsabels per ina surfatscha da 6500 hectaras uaul e pastiras d'alp. (cdm/fmr)



«Epi il mund dil Zumstein, dil geblès e cargafein e carghem e scadanem» – in maletg dil diari fotografic «Vrin» da Verner Soler.

FOTO VERNER SOLER

Fenomen Vrin

Igl autor Leo Tuor ha mirau e legiu il cudisch «Vrin» da Verner Soler – ed el smarvegla. Ina presentaziun.

LEO TUOR

Schoneuncrass. In va ord il paradìs e dalla val ora vi sur mar ella California e setschenta el marcau dils aungheis, Los Angeles. Ei ius dad in paradìs en tschel. Il paradìs ei leu, nua che ti sempos da nuot, ed in aungel ni zatgei catscha in di ora tei, e ti sas buca daco; ni leu, che cura che ti eis finalmein viaden, vuls ti scappar ualti spert puspei viado. Il paradìs ei plinavon era quei ch'ei vargau e vegn maina pli, quei che ti tratgas da haver giu. Patria sa esser paradìs, sche ti eis lunsch naven. Sa era esser uffier, sche ti eis memia viaden.

Trer naven la blaha

La California ei gia dapi 1850 in siemi per biars. Numerus dils nos ein in California e setschenta a Chicago. Enstagl ch'ei fussen i a Samarkand. Mo leu anfla ti quei che ti fantieschas, pertgei Samarkand ei in siemi. In datti, in, che ha anflau la California gest avon casa en ina val, en Valesa. El veva mo in bratsch ed era cuntents cu el ha teniu siu Jeep sper la ruina dils hotels. Ses eglis vevan la glischur dils cavauur cu els ein en tschiel. El ha detg: «Wansin», tratg naven la blaha sper el sil sez; ed avon nus igl aur dalla veta; ed eran en California.

Ussa vegn in o da Los Angeles, tila naven la blaha, ed avon nus siu Vrin en in cudisch. Nus sfeglein ellas fotografias, sesperdin els detagls: la lupa sin meisa stiva denter las dunnas che fan ora legns, il rispli, il gummi, il parlet d'aua benedida davostier vid la preit, fotografias stuschadas ella rama dil glas dil puffen, in sogn da Sur canoni. La stiva. Vesein munds. Quel dallas uras stiva ed uras cuocu, il barometer, las stivas dallas pegnas scalegl e dils scalfins sut pegna en, ed ils zoccolis o sil hund. Ils geniturs che legian la gasetta, il mat vegl en stiva cun tschiep e capiala che mira el paradìs.

Ils munds

Nus essan el mund digl Aebi cun quei tanc da benzin el pli tup liug ch'el sa mo esser, leu sc'ina buot pintga da vin. Quei Aebi cun schoc da far anavos, cun cuplic e bremsa e zapfvèlla e las cruschas stericas che train tei ellas curvas. Il buob seturpegiava digl Aebi cun cruschas. Epi il mund dil Zumstein, dil geblès e cargafein e carghem e scadanem. El mund dil zuffel essan nus e dils davos zuffens che vegnan purtai sil zugl dils pigns, che vulan esser sco'ls gronds che portan ils ponns dallas plauncas si. Nus essan el mund dil davos fazalet da nas ch'ei perfin sil maletg sin svanir el nuot, el mund dils cavels dalla mumma ch'ella ha adina giu zuppau, e la bellezza da quella cavellera che semuossan per ussa ch'ella ei veglia e ch'ella po buca pli far si sia cuma. Sin in auter maletg la mumma, ses mauns che raquantan la veta. Sco ils mauns dalla mumma da Düerer. En Vanescha orda finiastra miran mauns a Diu; encunter la preit tegia la festa, vid il post ina buccada termometer e sil parsiel ina cavazza sblihada.

Cheu ei il fravi vid la maschina. Exact sco el era. Las larmas seglian els eglis a mi. Sia egliada silla ruosna ch'el fora. Mia egliada tuorbla sils cullis da scriver el sac digl überkleid sin siu pèz. Cheu ei il survigilader sco zavrader, e quel dasperas culla gliesta e rispli. Il professor ella procession, che tegn l'asta cun forza, fagend sbargattuns, exact sco schon ils baldachiners tier Muoth el Gioder. Il vegl pastur culla capetscha sc'ina sadiala sur tgau giu, che sesa sil blic, sepusa vid in scanatsch, setegn vid il mogn, cun scalfins. La pastura che mulscha, sin esch tegia el sadlut blau cun si Bratbutter, la caura che ti sas buca tgei ch'ella studegia, las ureglias agradora e dretg el maletg, grond, il fuostg d'ina nuorsuna cun marca ell'ureglia dretga cun tagliu en ina mesa glina.

La faultsch ed il bab

Lu vein nus igl uaffens per se dalla pura, dil pur: la faultsch. La descripziun, co la dunna sega, co ella tila si la faultsch, co la mumma fa quei auter ch'el bab, cun outra melodia e tun e tut quei, descret el lungatg da Vrin. Fetg bi! La faultsch cheu descretta exact schi prominent sco ella literatura mundiala tier Tolstoi. Pervia dalla faultsch, remplazzada uss da curriders e curridras che binglan giu rovans cun trimer e vergna, suandai dil suflafeglia che spuorla baus, che manezza viarms ed insects ellas arias, quei successur dil risti cun dents da plastic e pli baul cun dents da lenn ch'ins survegna forsia aunc cun cletg tiel Zinsli. – In scadenem sco da far l'amur cun maschina. – Sulettamein pervia da quei omagi alla faultsch ston ins haver quei cudisch, lu pervia dils detagls, lu pervia dils treis lungatgs che raquantan pils Americans, pils Svizzers e Tudestgs, e pils Romontschs. Lezs texts ein ils cuorts, perquei ch'els da Vrin ein buca quels da bahaultschas.

Il cudisch ei plinavon in monument al bab. Tragedia e plascher dad esser bab semuossa cheu. In bab tut auter ch'el patriarc, in bab sternius sil toc, in bab sin canapè, in bab pensiv che sesa sila chista d'uaffens el clavau vit, in bab che metta cunterpeisa alla dira construcziun da Sartre, sia constataziun ch'ei detti buca buns babs.

Sco bab, denton era sco in ch'ei restaun el paradìs ed ha aschia adina da sefar cugl aungel burriu, saiel bien grau a Verner Soler per sia ovra e dapli lessel ca tradir. Cumprei sez il cudisch e seperschuadi.

Il cudisch «Vrin» da Verner Soler ei venals ellas librerias ni sut www.chasaeditura.ch.

Leo Tuor è stà documentalist ed è autor – e viva a Val (Surrein).



«Il cudisch ei in monument al bab», scriva igl autor sursilvan Leo Tuor en sia recensiu.

FOTO VERNER SOLER